



土岐文庫  
文庫17  
W23  
I





文庫 17  
W23  
1

昭和六十年二月一日贈  
土岐善吉居士寄

010185193077



觀無量壽佛經疏妙宗鈔卷上  
此經義疏人稀淨報故說聽者多矣  
所稟寶雲師首製記文相公至今著述不絕皆  
宗智者豈有不知修心妙觀感四淨土文義者  
耶良以愍物情深適時智巧故多談事相少示  
觀門務在下九普霑緣種方今嘉運盛演圓乘  
慕學之徒皆欲得旨而修證矣故竭鄙思鈔數

知禮述



十言上順妙宗略消此疏適時之巧非我所能  
願共有情即心念佛乃此鈔所以作也天禧五  
年歲在辛酉重陽日下筆故序 此之疏題  
佛等八字備舉經目皆是所釋唯疏一字是能  
釋也今之五章釋其八字義稱委悉入文自見  
若欲預知可陳梗槩經是通號餘是別名今且  
明別佛說者釋迦化主四辯宣演也 觀者惣  
舉能觀即十六觀也無量壽佛者舉所觀要攝

十五境也且置能說略明所觀能觀皆是一心三  
觀所觀皆是三諦一境毗盧遮那徧一切處一  
切諸法皆是佛法所謂衆生性德之佛非自非  
他非因非果即是圓常大覺之體故起信論云  
所言覺義者謂心體離念離念相者等虛空界  
無所不徧法界一相即是如來常住法身依此  
法身說名本覺故知果佛圓明之體是我凡夫本  
具性德故一切教所談行法無不爲顯此之覺



體故四三昧通名念佛但其觀法爲門不同如  
一行三昧直觀三道顯本性佛方等三昧觀祖  
持顯法花兼誦經觀音兼數息覺意歷三性此  
等三昧歷事雖異念佛是同俱爲顯於大覺躰  
故雖俱念佛而是通塗顯諸佛躰若此觀門及  
般舟三昧託彼安養依正之境用微妙觀專就  
弥陀顯真佛躰雖託彼境須知依正同居一心  
心性徧周無法不造無法不具若一毫法從心

外生則不名爲大乘觀也行者應知據乎心性  
觀彼依正依正可彰託彼依正觀於心性易發  
所言心性具一切法造一切法者實無能具所  
具能造所造即心是法即法是心能造因緣及  
所造法皆悉當處全是心性是故今觀若依若  
正乃法界心觀法界境生於法界依正色心是  
則名爲唯依唯正唯色唯心唯觀唯境故釋觀  
字用一心三觀釋無量壽用一身三身躰宗力



用義並從圓判教屬類五重玄義本是經中所  
詮觀法大師預取解釋經題欲令行者用此觀  
法入十六門而爲修證故於序文以主包衆以  
正收依觀佛既即三身觀餘豈非三昧寄語行  
者觀雖深妙本被初心若能進功何憂不就縱  
未入品爲因亦強生至彼邦得預大會所見依  
正微妙難思速入聖階度生亦廣永異事善及  
小乘行得往生者如此土人宿圓修者於諸座

席見相殊常聞法易悟以此類彼功在妙宗但  
爲戒福不精無往生願故在穢土聞法入真須  
懼娑婆不常值佛縱遇善友色心不勝難發我  
心況塵境鹿強誠爲險處故須外加事懺內勤  
理觀正助雙行加願要制必於寶剎速證無生  
今解觀門其意在此疏者疎也疎通決擇上之  
義趣通而不壅令其行者得意修之故也次能  
說入號備於別傳及諸章紀有未知者須尋彼



文二釋文初釋序三初叙經觀意二初正明觀  
行二初叙意二初對垢立淨二初法二初明二  
報苦樂欲論觀行先示二報苦樂之相文有四  
句一一論淨穢相對初句以所成國土苦樂相  
對安養淨國但受諸樂故名樂邦堪忍穢土多  
受衆苦義言苦域次句以能成物躰貴賤相對  
彼純七瑯略言金寶此多衆穢略語泥沙次句  
以初生受質垢淨相對此土六道具有四生全

就人中多從胎藏母食冷熱及飢飽時兒在胎  
中如處寒熱倒懸山壓地獄之苦故云胎獄彼  
土九品八從蓮生下品之人雖經多劫大本中  
說疑心修善生彼胎宮樂同初利況八九品不  
生疑惑豈有苦耶是故花池受生即樂次句以  
生後游麀鹿好相對此則荆棘叢林彼則金渠  
玉樹然此四句雖一一句苦樂相對意則對穢  
顯彼淨相又復應知四句之文似唯顯示同居



二土據下明宗具論四土淨穢之相以後驗此  
不專同居當知四句一一通於四種淨穢見思  
輕重則感同居樂邦苦域躰折巧拙則感方便  
樂邦苦域次第頓入則感實報樂邦苦域分證究  
竟則感寂光樂邦苦域以例金寶泥沙胎獄花  
池棘林瓊樹亦復如是是一家制立正文與序必  
不相違但序惣示宗文別說是故似異問下三  
淨土既皆有相則可論於金寶等事寂光之淨已

全無相如何可說金寶花池及以瓊樹答經論  
中言寂光無相乃是已盡染礙之相非如太虛  
空無一物良由三惑究竟清淨則依正色心究  
竟明顯故大經云因滅是色獲得常色受想行  
識亦復如是仁王稱為法性五陰亦是法花世  
間相常住大品色香無非中道是則名為究竟  
樂邦究竟金寶究竟花池究竟瓊樹又復此就  
捨穢究盡取淨窮源故苦域等判屬三都樂邦



金寶以爲寂光若就淨穢平等而談則以究竟苦域泥沙而爲寂光此之二說但順悉檀無不圓極問佛無上報是即理之事可論金等究竟寂光是即事之理豈有金等若其同有事理既混如何分於二土義耶答佛無上報是究竟始覺上品寂光是究竟本覺始本既極豈分二體應知二土縱分事理實非有無豈真善妙有而非理耶秘密之理豈同小空故此事理二名一體

復本故名無上報事也以復本故名上寂光理也故妙樂云修得四德本有四德二義齊等方是遮那身土之相况淨名疏顯將寂光爲佛依法故知定執報土有金寶等寂光定無斯乃迷名全不知義矣二誠由下明二因心行誠實也由從也報之淨穢實從心行二因致感心即迷了二心行即違順二行六道三教迷三德性爲三惑染故曰垢心身口諸業違理有作皆名



惡行此之心行感四穢土沉下鹿淺也唯圓頓  
教了三德性離三惑染方名淨心身口諸業順  
理無作稱爲善行此之心行感四淨土高升深  
妙也心雖本一以迷了故須分垢淨行業雖同  
以違順故須開善惡從此二因感報淨穢應知  
圓人以上寂光而爲觀躰九聖因位皆即究竟  
不同別人要心只齊十二品故分證穢正在  
別教問至理微妙不垢不淨無取無捨今立垢

淨令人取捨既乖妙理即非上乘何得名爲修  
心妙觀顯一實相若據名求義萬無一得以義  
定名萬無一失良以理外理內小乘大乘漸次圓  
頓所立名言聲多相似須以邪正定其內外次  
以空中甄其小大復以漸頓分其別圓則使各  
言纖毫不濫方可憑之立乎觀行是故今家評  
此等義而用六句判於同異所謂相破相修相  
即各有二句即六句也今用此六判此相違先



以別義定其同名所謂外道斷無不垢不淨見  
二乘空理不垢不淨證別教但中不垢不淨門  
圓教秘藏不垢不淨理復有四淨外道忻厭執  
淨之見二乘斷惑滅淨之證別教離染漸淨之  
門圓教即染頓淨之理既知此已乃可論於淨  
與不垢不淨相破之句圓教頓淨破於別教二  
乘外道不垢不淨圓教不垢不淨破於三種之  
淨相修句者三種之淨修於圓教秘藏不垢不

淨三種不垢不淨修於圓教即染之淨相即句  
者圓教即染之淨即是秘藏不垢不淨秘藏不  
垢不淨即是即染之淨今之妙觀即於染心觀  
四淨土既照寂光豈異秘藏不垢不淨耶若謂  
今經捨穢取淨異於秘藏雙非理者何故韋提  
聞觀淨土分證秘藏耶應知今淨淨於垢淨乃  
以垢淨平等之理而爲於淨名偏義圓斯之謂  
矣但以機緣捨穢心強宜以淨門淨一切相故



今談淨與不垢不淨全不相違又復應知取捨  
若極與不取捨亦非異轍二喻形端喻淨因了  
性淨心順理善行影直喻果四淨土也源濁喻  
穢因迷性垢心違理惡行流昏喻果四穢土也  
若翻上喻形曲影凹自可喻於逆修因果若翻  
下喻源淨流清亦自可喻順修因果今舉二喻  
各喻一種其義甚明二故知下就淨示修上已  
對穢顯於淨相故今就淨而明修法前示二因

通云淨心及以善行此明修相故的指今十六妙  
觀三種淨業於十六境不照三諦豈名妙觀修三  
種福爲三惑染不稱淨業妙觀是正淨業爲助正  
助合行能感四種極樂國土得見三身弥陀世尊  
文從互說觀論生土業論見佛依正既俱正助非  
隔二然化下示文二初示教興二初明興由革凡  
之化要因近事而爲鴻漸詮理之教必藉機緣方  
興起近事爲漸通於諸化今化別由殺逆之事欲



令衆生厭濁世故此教當機是韋提希花言思惟  
善修觀故二大聖下明現土佛是極聖故稱爲大佛  
慈下被名之曰垂託韋提請布所證理名乘機演法  
曜王相等者經云尔時世尊放眉間光徧照十方無  
量世界還住佛頂化爲金臺如須弥山雖廣示等者  
經云十方妙國皆於中現或有國土七寶合成復有  
國土純是蓮花乃至云時韋提希白佛言是諸國土  
雖復清淨我今樂生極樂世界阿弥陀佛所二使未

下示觀相二初惣標使末俗等者經云教韋提  
希及未來世一切衆生觀於西方極樂世界以  
佛力故當得見彼淨國土等二落日下別示十  
六觀法不出三類即依報正報及三輩往生今  
順此三撮要而示文自爲三初依報初觀落日  
狀如懸鼓令心堅住專想不移此有二意一令  
觀日心不馳散二令心想正趣西方故云用標  
迭想之方次觀清水復想成冰良以彼土瑠璃



爲地此地難想且令想水水想若成寶地可見  
故云寶表瑠璃之地次示樹觀而經但云其諸  
寶樹七寶花葉無不具足而無風吟天樂之事  
乃取小本中語成今樹觀之文故彼經云微風  
吹動衆寶行樹及寶羅網出微妙音譬如百千  
種樂同時俱作故云共天樂而同繁次示地觀  
經云有八池水從如意珠王生分十四支黃金  
爲渠其摩尼水流樹花間其聲微妙宜說苦空

無常無我諸波羅蜜等故云將契經而合觀上二  
觀肉下示正報先明觀音勢至二菩薩觀以此  
二觀皆明肉髻故云若有欲觀觀世音菩薩者  
先觀頂上肉髻次觀天冠其餘衆相亦次第觀  
之勢至經云頂上肉髻如鉢頭摩花於肉髻  
上有一寶瓶盛諸光明普現佛事餘諸身相如  
觀世音等無有異斯是如來教示行者想二大  
士觀法之要也此二菩薩次當補處今爲近侍



故云瞻侍者也次示弥陀觀經云觀無量壽佛者從一相好入但觀眉間白毫極令明了見眉間白毫者八萬四千相自然當現豈非教示觀法之門故云念毫相而觀如來也三及其下示三輩觀下疏判云觀三品往生有二意一令捨中下修上品故二令識位高下即大本三品故此之二意初策自行次則觀他故今略叙就策自行即修觀行入功有淺深致使往生相分三

品故云及其瞋目告終等也初明上品上生及上品中生以經明上生乘金剛臺中生坐紫金臺故云上珍臺也次文成下明上品下生經云即見自身坐金蓮花文成即壞者大經二十七云譬如蠟印印泥印與泥合印滅文成以喻九夫現在陰滅中有陰生今借此文以喻往生菩薩此上陰滅彼國陰生須知垂終自見坐金蓮身已是彼國生陰故也成論明極善極惡俱不



經中陰如讚示離手也上雖三品但是上輩次  
惣示三輩往生之者俱出輪迴言隨三輩者非  
謂隨他蓋是隨已所修三輩行業皆能橫截五  
道永得不退也大本云往生安養國橫截五惡  
道五苦者此方五道俱不免苦天道縱樂還墮  
惡趣故二可謂下結歎觀行微行者歎三種業  
雖是身口運爲之善今順理修皆成無作幽微  
無相之行妙觀者歎十六觀雖託安養依正之

境而皆稱性絕待照之即不思議圓妙觀也此  
之觀行能令修者達四淨土縱具見思而能不  
退誠爲至極之道要妙之術如此歎結意令聞  
者尚之修之不肖之徒輕欺生死不求不退於  
斯要術生謗鄙人痛哉痛哉二此經下叙經宗  
以觀佛而爲題目疏今乃以心觀  
爲宗此二無殊方是今觀良以圓解全異小乘  
小昧唯心佛從外有是故心佛其體不同大乘



行人知我一心具諸佛性託境修觀佛相乃彰  
今觀弥陀依正爲緣熏乎心性心性所具極樂  
依正由熏發生心具而生豈離心性全心是佛  
全佛是心終日觀心終日觀佛是故經目與疏  
立宗語雖不同其義無別又應須了若觀佛者  
必須照心若專觀心未必託佛如一行三昧直  
觀一念不託他佛而爲所緣若彼般舟及此觀  
法發願即觀安養依正而觀依正不離心性故

曰心觀須知此觀不專觀心内外分之此當外  
觀以由託彼依正觀故是以經題稱爲觀佛若  
論難易今須從易法花云佛法太高衆生太  
廣初心爲難心佛衆生三無差別觀心則易  
今此觀法非但觀佛乃據心觀就下顯高難修  
佛觀不名爲難是知今經心觀爲宗意在見佛  
故得二說義匪殊塗又應了知法果圓融不思  
議體作我一念之心亦復舉體作生作佛作依



作正作根作境一心一塵至一極微無非法界全體而作既一一法全法界作故趣舉一即是圓融法界全分既全法界有何一物不具諸法如義例中辟解師云四教中圓唯論心具一切諸法身色依報則不論具唯一頓頓方明三處皆具諸法判谿論曰四教中圓何嘗不云三處具法稟今宗者若云心具色等不具同彼謬立漸圓之見望彼頓頓天地相懸尚劣於彼何頓

今宗以一切法一一皆具一切法故是故今宗立於唯色唯香等義若其然者何故經論多以一心爲諸法惣立觀境耶良以若觀生佛等境事既隔異能所難忘觀心法者近而復要既是能造具義易彰又即能觀而爲所照易絕念故妙文云三無差別觀心則易縱觀他境亦須約心此經正當約心觀佛也實相爲體者心觀之宗方能顯發中道實相深廣之體所以者何若



於心外而觀佛者縱能推理但見偏真即如善  
吉觀佛法身但證小理今約唯心觀佛依正當  
處顯發中實之體中必雙照三諦具足故云此  
經心觀爲宗實相爲體文特於此舉宗體者成  
前叙觀顯後叙題成前者以叙觀文雖具三觀  
四土之義語且惣略恐失意者謂但叙於同居  
淨土觀行之意故叙觀畢特示唯心妙觀之宗  
以顯中道實相之體實相既是常寂光上若謂

十六只觀應佛依正之相豈能顯此實相寂光  
若於十六用圓三觀尚能感得寂光極樂豈不  
能感三土極樂以此成前樂邦金寶等諸文義  
皆明四種淨土因果也顯後者行人若得此宗  
射意則知叙題能說之佛所說觀境徒衆依報  
及以通名如是諸義悉皆圓妙非小非偏方是  
今經首題名字叙觀叙題兩楹之際示乎宗射  
其意在茲三所言下叙經題目二初別題七字



具舍能說所說能觀所觀正文釋名備顯其義  
今序但明以勝攝劣攬別爲題立題之意也以  
十六境佛境最勝故云佛是所觀勝境蓋十六  
觀不出依正及以徒主若論依正佛是正報舉  
正收依則攝日水地樹等六觀也若分徒主佛  
是化主述主已徒則攝觀音勢至三輩等九觀  
也故云觀雖十六言佛便周故入正文以圓三  
觀釋乎能觀以妙三身釋所觀佛佛既惣攝餘

十五境豈不一一皆是圓妙三諦三觀耶二經  
者下通題儒經講解有效二訓萬代軌則故訓  
法也百王不易故訓常也佛經亦然十界咸規  
三世不易復以由義而釋於經由佛大聖金口  
宣吐自證之法故名爲經法花玄義亦通名  
當宗學人不可不究二入文二初取多釋題二  
初標列註云云若今依諸部明於通釋五章之  
義妙玄最委故彼文云就通作七名共解二標



章二引證三生起四開合五料簡六觀心七會  
異標章令易憶持起念心故引證據佛語起信  
心放生起使不雜亂起定心故開合料揀會異  
等起慧心故觀心即聞即行起精進心故五心  
立成五根排五部成五力乃至入三解脫略說  
七重共異如此今疏從略但標五名也二隨釋五  
初釋名二初標二一切下釋二初對通略示二  
初就三麤論通別三初約一化二初釋二初示

諸題具通別他釋經題皆以經字為能詮教餘  
字並是所詮之義作此分之甚違佛旨且人法  
譬皆是名字豈非能詮耶得一向屬所詮義經  
字不可一向屬教如妙經云法花經藏深固幽  
遠無人能到又云為佛護念植種德本入正定  
聚發救一切眾生之心成就四法必得是經疏  
釋此四是開示悟入佛之知見知見證理名為  
得經此二豈非以理為經金光明云十方諸佛



常念是經豈令諸佛但念於教此例蓋多不能  
備引故知諸師以能詮所詮釋衆經題失旨  
之甚今家皆用通別釋題方無所失二通則  
下明通別今解諸經通別二名俱是能證俱是  
所詮良以通別名自具於教行理故勿謂二名  
但在於教須知通別自有教名行名理名如一  
別題佛說是教觀即是行無量壽佛是理豈非  
別教別行別理以此三別對於經字即是通教

通行通理今於三中初明教通別二初正明一  
化通名著頓說漸說施權開權律論之外皆名  
爲經故稱通也別名者別相乃多今從三種謂  
人法譬單三復三并具足一以成七別單三者  
單人如阿彌陀經等單法如大般涅槃經等單  
譬如梵網經等複三者人法如文殊問般若經  
等法譬如妙法蓮華經等入譬如如來師子吼經  
等入法譬具足者如勝鬘師子吼一乘大方便



方廣經等以此七別與通合標一代佛法二今  
經下別指此經本論一化言此經者以明七別  
此屬單人是故言也雖屬單人而人自分能談  
釋迦所說弥陀以此二人而為別目經同一化  
故曰通名據有觀字合是人法能從於所以人  
兼之故略不示然分通別不同廣釋故未委悉  
二為行下行通別諸經有用一種之行而為別  
名以對通名經即通行若論別行其數無量卒

難說盡今以增數示於行人似可頗會頌人一如一  
行等二如二智等三如三觀等四如四念等五  
如五根等六如六妙等七如七覺等八如八正  
等九如九禪等十如十度等乃至百千萬億無  
量行也此等別行皆趣涅槃究竟四德略言常  
樂約趣涅槃別行即通故為行經彼釋籤中乃  
以因果判行通別須知其意非謂至果其行方  
通欲知意者據各修因名為行別約趣一果此



別即通斯乃別時論通通時論別豈唯行介教  
理亦然如以機應對教通別佛以一音演說法  
衆生隨類各得解各解則機別一音則應通各  
解不離一音一音不妨各解如金光明玄以能  
詮文字爲教通以能詮所以爲教別所以即是  
四悉檀也一一悉檀皆用文字一一文字不離  
悉檀如以名實對理通別多名不離一實一  
實不妨多名二通故別皆悉同時悉類樂中管

聲之韻約聲則通約曲則別二用不相妨礙三  
理雖下理通別名實相對名即是門乃以四門  
彰一理也亦是事別而對理通良以諸經多用  
一事而彰於理得理別名如此經題以無量壽  
佛名爲別理以對通名經則通理若於一化以  
通別理解經題者莫若四門以爲別理四門者  
有門空門雙亦門雙非門四門名通須分四教  
所謂三藏教通教別教圓教四教各開有等四



門四四乃成一十六門詮於別理成十六理理  
尚非一那得十六然理無礙能應諸門猶彼虛  
空其體實非方圓大小以無礙故故能隨彼方  
圓等物成無量相從無量說即是別理體是一  
空名通理無通不別無別不通通別合標成一  
題目二此約下結五時之內一一經題皆具通  
別若不用此教行理判徒分通別全無所以也  
然無量行會一常樂四教四門同詮一理若專

方等未堪此聞乃是預取法花之意跨節而談  
於佛滅後解釋諸經不約法花寧窮一化二更  
約下約一題一化經目通別二名具教等三關  
涉既廣思修或難故就即今所解經更明教行  
理宛然可見此三皆別以對經字即三三通故  
云任運有通別意欲使行者即此一題就說解  
教起能觀行見真佛理三更就下約一字雖約  
一題而涉三名今示一字解行證一證得具足



此復爲二初就說字兼舍釋題中說字最可顯  
於教行并理故引釋論所行如所說句以示說  
中含於行理如者真如也如名不異一真覺性  
物我無殊三際平等契此如理方得心口說行  
不異故金剛般若云云何爲人演說如如不動  
法花云諸法空爲座處此爲說法事相解如一  
物相似以爲不異理觀解如二物性一方名不  
異故釋經如是三藏則以傳佛所說似水傳瓶

名曰文如行教不余通以二諦相即爲如別則  
唯聞中道爲如圓以文字性離爲如三教約此  
方曰文如論就理觀心口理一方得說行如如  
不異此令說者行契如理也二佛即下就諸字  
具釋佛復本源究竟覺體非寂非照故屬法  
身二字即是清淨智慧寂而常照故屬般若無  
量壽是自在神通照而常寂故屬解脫今將諸  
字分對三德深有所以所以者何向就一字明



教行理雖約說字義具於三既約修辨尚通前  
教而又未明字字具三故今特用涅槃三德對  
於諸字乃彰諸字性各具三非前教人所能  
思說良以三德性本圓融一一互具故直法身  
非法身法身必具般若解脫直般若非般若般  
若必具解脫法身直解脫非解脫解脫必具法  
身般若三德即是教行理三般若若教智在說  
故解脫是行用從緣故法身屬理是所顯故佛

字既是法身之理即具二德及教行也觀字既  
屬般若之教亦具二德及行理也無量壽既是  
解脫之行亦具二德及理教也若不然者豈得  
即一達三即三達一問本以一字具教行理今  
何得以無量壽三字方具於三則不名爲約一  
字也若以頌諸字對三德釋斯是妙談貴在得  
意欲令行者知三德性徧一切處一字一句一  
偈一品一部一經一時一化乃至一切依正色



心多亦三德少亦三德一塵三德不小刹海三德不大故引花嚴云一中解無量等也若得此意今之妙觀有造修分應色一相可照三身依報一塵即寂光土故十六觀皆照三諦其不信者則辜<sub>三</sub>吾祖立茲法矣二於一下約一字以按量三初正按量上窮妙旨從廣至狹今按功德從少至多一字尚詮大涅槃理況一切經豈不圓徧二故經下引經證如金光明及諸大乘

多作此說三若不下結今得不明一字圓具三德諸經所說一句一題受持功德無量無邊便成虛說也自非道場得入三昧發旋惣持曷能妙說自在若斯二初釋下就別廣明置通釋別也文四初釋佛字二初正約佛名示六即二初翻名標亦梵云佛陀花言覺者即說教主別號稱曰釋迦牟尼通號有十今舉第九故標佛也既是極果即究竟覺起信論云覺心初起心無



初相遠離微細念故心即常住名究竟此覺圓  
淨無所對待生佛依正鎔融徧攝十方三世且  
徹無外五住二死盡淨無餘無量甚深永絕思  
議強名妙覺此之覺義有六種即即者是義今  
釋迦文乃究竟是圓淨之覺一切九聖無不全  
體皆是此覺雖全體是且迷悟因果其相不同  
故以六種分別此是所謂理是名字是觀行是  
相似是分證是究竟是然若不知性染性惡所

有染惡定須斷破如何可論全體是耶全體是  
故免於退屈六分別故免於上慢六不離即即  
不妨六六即義成圓位可辨問所言九聖全體  
即佛為即自己當果之佛為即釋迦已成之佛  
若自己當果釋迦已成二佛之辨究竟不別故  
謬果佛為生性佛迷則俱迷見則俱見故已他  
佛於今色心皆可辨於六即義也又復應知六  
即之義不專在佛一切假實三乘人天下至結



蜚地獄色心皆須六即辨其初後所謂理蜚蜚  
名字乃至究竟蜚蜚今釋教主故就佛辨以論  
十界皆理性故無非法界一一不改故名去  
不唯顯佛九亦同彰至於果成十皆究竟蜚蜚  
等皆明六即二涅槃下就覺廣明六初理即六  
種即名皆是事理躰不二義而事有逆順名字  
等五是順修事唯理性一純逆修事此逆順事  
與本覺理躰皆不二其逆順名自何而立以知

不二事皆合理名之為順其不知者事皆違理  
故名為逆名字等五若淺若深皆知皆順若初  
理即唯迷唯逆而迷逆事與其覺理未始暫乖  
故名即佛所以者何良由衆生性具染惡不可  
變異其性圓明名之為佛性染性惡全體起作  
修染修惡更無別體全修是性故得迷事無非  
理佛即以此理起惑造業輪迴生死而全不知  
事全是理長劫用理長劫不知不由不知便非



理佛以全，是故名理即佛。以不知故，非後五即然。理即佛，敗之極也。以其全，之解行證即。但有理性自尔，即也。又理即佛，非於事外，指理為佛。蓋言三部理全，是佛。又復應知，不名部即佛。而名理即佛者，欲彰後五有修德，是此之一位。唯理性是也。又部即佛，其名猶通以後五人皆了。三部即是佛，故釋此為三。初引諸經示，即初引大經迦葉品云：衆生即是佛，何以故？若離衆生，

不得三菩提，故如來性品。我者即是如來藏義。一切衆生悉有佛性，即是我。我如是從本已來，常為無量煩惱所覆，是故衆生不能得見。如貧女人舍內多有真金之藏，家人大小無有知者。時有異人善知方便，乃至即於其家掘出金藏。又云譬如王家有大力士共人，眉間有金剛珠與餘力士角力相撲，而彼力士以頭觸之，其額上珠尋沒，膚中都不自知。是珠所在，其處有



瘡即命良醫欲自療治乃至時醫執鏡以照其面珠在鏡中明了顯現等如來藏經十喻若彼經十文一法九喻一是所喻九是能喻以所從能故云十喻一法若經云佛告金剛慧菩薩我以佛眼觀一切衆生貪瞋癡諸煩惱中有如來智如來眼如來身結加趺坐儼然不動善男子一切衆生雖在諸趣煩惱身中有如來藏常無染汙德相具足如我無異於此文後即舉九事

以喻其法各有長行重頌一萎華佛身喻二嚴蜂淳蜜喻三糠粃粳米喻四糞穢真金喻五貧家寶藏喻六菴羅內寶喻七弊衣金像喻八貧女貴胎喻九焦模鑄像喻弊帛者經偈云譬如持金像行詣於他國裹以穢弊物棄之在曠野天眼見之者即以告衆人去穢現真像一切大歡喜我天眼亦亦觀彼衆生類惡業煩惱纏生死備衆苦又見彼衆生無明塵垢中如來性不



動無能毀壞者。土模者。經偈云。譬如大冶鑄無量真金像。愚者自外觀。但見焦黑土。鑄師量已。冷開模。令實現。衆穢既已除。相好劃然顯。我以佛眼觀衆生。類如是。煩惱淤泥中。皆有如來性。閻室下。復出涅槃經云。如閻室中。井及種種寶。人亦知有閻。故不見有善方便。然大明燈照之。得見是人終不生念。是水及寶本無。今有涅槃亦爾。本自有之。非適今也。大智如來以善方便。

燃智慧燈。令諸菩薩得見涅槃。今文但引閻井具寶。以證理。即不取人。亦知有等。文諸喻皆余須知。諸喻理兼圓別。若言三鄣定覆佛性。破鄣方顯。此猶屬別。若全性成鄣。鄣即佛性。以不思議德性消者。則諸喻皆圓方。是今文理。即之喻。故如來藏喻止觀顯別。今文顯圓次。淨名皆如。語尚涉通。今須圓解。次寶篋下卷。勝志菩薩向佛說偈。已果及法界衆生同等。已果即心法。



果即佛法佛以法界而為身故對衆生果即成  
三法心生在因佛法在果三無差別故云一界  
無別界也二此是下就本覺明佛前引諸經雖  
云即佛猶未的示覺了相且指三鄣身全是理  
今示此理當處照明名爲本覺佛義成也此自  
分二初正示言此是者指上大經衆生即佛  
諸喻寶物淨名皆如寶篋法界此等皆是本性  
圓智非三般若融即微妙智不名圓智一切法

一一含受一切諸法全法是智全智是法待對  
斯絕名圓覺諸法諸法乃是生佛依正三際十  
方此等時處既全是智何有一處一物一塵身  
不明了然此明了非心意識所能及也故起信  
論本覺義云心跡離念無所不徧等虛空界本  
性明了既其離念安以情求所謂不思議智照  
準也勿認六道漏心三乘證智而爲本覺明了  
之相妙覺之覺方是理佛全修在後斯之謂歟



二雖五下遮情情執者云諸有業縛無明惑暗  
那言衆生即是佛耶故遮之曰雖業至無間而  
皆當躰是三解脫雖見思昏倒而本覺理未始  
不存惑業全是性德緣了佛性豈可更壞理佛  
耶刀不自傷故三斯理下對四事辦理世間常  
住者即十法界三十世間一一皆住真如法位  
法位常故世相亦常然世本代謝而言常者以  
一切法即真實性性不改故故名爲常若謂遷

流不可言常斯謂情見良以生法即性故常住  
我滅法即性故常即性之常非常無常不可思  
議言偏意圓故可得云一生一滅無非中道唯  
生唯住唯異唯滅法華迹門顯所證云世間相  
常住於道場知己本門乃云如來如實知見三  
界之相非如非異故知世間即是三界常住豈  
乖非如非異本迹雖殊不思議一也此理秘妙  
佛能明見故故云灼然今我智者成秘妙觀雖



是肉眼而名佛眼能見秘藏亦云灼然故妙樂  
云顯露彰灼稱為真秘真秘之理即世相常世  
相常故衆生即佛此理妙故有佛教化不益一  
毫空過無佛不損一毫五即得之何足為高理  
即失之未始暫下對此四事示理佛也二如斯  
下名字即此至究竟皆修德也須論損益及以  
高下言名字即佛者修德始聞前理性能詮名  
也然有收簡收則耳歷法音不聞明昧異全不

聞俱在此位簡則未得圓聞齊別內九尚屬理  
以七方便未解妙名豈知即佛此自分二初  
帶前示名字二初不開之失理雖是佛全體在  
迷佛出不聞經名絕聽此乃却指但理之失也  
二若佛下聞名之得六即辨佛故今名字唯約  
三寶及十號也無明長夜佛出令曉闡本智日  
乃識三寶照世光明生死巨關無佛長鎖佛能  
於此開甘露門令知十號是常住味此光此味



乃從衆生心性流出還使衆生解此光味即本性佛因說等者却指貧女舍寶喻也初既不知家有寶藏唯受貧苦因示得知寶雖未掘頭生適悅此等法喻皆示於名有識知義能知所知即名字佛二故須下引入明即佛梵云須達多此云善施亦曰給孤獨涅槃二十七云舍衛有長者名須達多爲兒聘婦詣王舍城宿珊檀那舍見彼長者中夜而起莊嚴舍宅乃問當請摩

伽陀王耶答云請佛須達初聞身毛皆豎復問今在何處答曰在迦蘭陀精舍須達思念欲見于時忽見光明如晝尋道而出城門自開見佛聞法證須陀洹疏云巨關即城門也今明毛豎即驚覺也聞名生覺即本性佛若論大經追叙昔事方證初果驗聞名時未能解了覺即本性及前科中三寶十號亦涉於小今約跨節取意而談五時示現身相名號說法度人乃至聞者



一念微解，一皆是全性起修，當處無非，本性佛法如前，一化增數，諸行皆會，圓常四教四門，唯詮一理，不從跨節焉。消彼文，況文出涅槃部，已開會，故約驚覺，示名字，佛三觀行，即此中，觀法異，常坐等，直觀心性，故說他佛而爲所緣，然是大乘，知心作佛，佛即是心，其觀未成爲塵，所動始自圓聞，觀佛妙鏡，至識次位，勤行五悔，若未發品，此等行人，皆屬名字，故知名字，其位甚

長，今明對塵，即成佛觀，其中念念覺知之心，名行，佛此自分二初，觀妙色，即真法，以大小相，同徧，故此色身，即是真法，又二初約一佛，二初始習，即心觀相，此是名字昇進之位，不獨能名能修，觀故，但未入品，非觀行，位觀佛相，者若此，經中八萬相好，非羸劣想，而可繫緣，故須初心，先觀落日，漸觀地樹，及以座像，觀既深著，方觀勝身，今依般舟初心，先觀千福輪相，次



第<sub>二</sub>達想<sub>至</sub>於肉髮三十二種是下品相復從足起可作始行繫心之境不須更以落日爲緣若相若好皆依於身身唯金色故云如鑄金像此之色相雖從心想如在目前故云與眼作對言妙色者即是不可思議色也所以者何由此行人已圓聞故知色唯心知心唯色五根所對尚體唯心况想成色豈在心外此色非色非色非非色而能雙照色與非色既離情想故名妙色

非由三觀莫見妙色非由妙色莫成三觀境觀相資塵念靡間方能得入觀行位也二開眼下明觀成稱性周徧妙心作相妙相發心心心不休成觀入品塵緣莫動佛常現前閉目了然開眼不失在明見佛處暗不忘性無間然佛豈翳關一一相海莊嚴法身相爲大相好爲小相觀大發小名爲流出却水雖大止劑二禪佛相周徧徧於法界且以分喻顯於周徧觀行佛眼名



曰周眸此眼所觀何處非佛問金光明玄義觀  
於三道顯金光明似位尚云閉目則見開目則  
失今觀三身位在觀行因何開閉俱得見耶答  
彼明性德金光明理此理初住方任運見故於  
似位猶論得失今帶事定託彼應色觀於三身  
以其應相凡心可見故理三身雖乃未顯不妨  
應色先與定合故今開閉皆見佛身如以三觀  
觀彼落日三觀未成而能開閉皆見於日故雖

事理一念同修而理難事易事易故先現理難  
故後發故般舟三昧以三十二相為事境以即  
空假中為理觀境觀雖乃同時而修境必生成  
託境進觀藉觀顯境更進更顯從凡入理故知  
彼就趣真無住對以愛頂墮為開閉得失此就  
應色得成觀行為開閉俱見不知事理難易淺  
深此相違文何能銷釋二念一下等諸佛二初  
約一佛等諸佛為成觀故不可散緣故以弥陀



一佛爲境雖觀一佛何異十方雖照現今何殊  
過未此彰一切不離弥陀良以弥陀是無量之  
一故能等於一中無量二一身下明諸佛同三  
法一佛等彼一切佛者以由佛佛同得三法身  
是法身智慧是般若十力四無畏是解脫亦是  
三身三涅槃等身智言一者顯於諸佛法報不  
別應用亦同故力無畏結云亦然同身智一也  
菩薩因中分破無明分同妙覺所證三法無明

破盡則究竟同諸佛三法諸佛三法既其不二  
故弥陀三法不少一切諸佛法不多故言等也  
二念色下念三身以結示色是應身通於勝劣  
及他受用法門是報身以諸法門聚而爲身即  
八萬四千陀羅尼爲髮第一義諦爲髻種種智爲  
頭慈悲爲眼無漏爲鼻四辨爲口四十不共爲  
齒二智爲手如來藏爲腹三三昧爲臂定慧爲  
足等此諸法門若從所證名爲法身今從能證



名爲報身自受用也實相是法身非不具於一切法門及諸色相讓於能證及垂應故今是所證及以能垂但名實相前論觀法文中但言相好周徧次文乃約三法論等至今結示云念三身應知法門及以實相不離色身舉一即三全三是一法亦相即非縱非橫是此經第九佛觀經示相好疏名真法不知圓觀此名莫消若觀色身不涉後二便同小外何預妙宗須知此文

是結前觀色相周徧已具三身二常運下明即佛觀行位人一切時處念佛三觀常得現前故云無不念時言念念皆覺者示即佛義雖是始覺即同本覺非全本覺觀不名中亦得義論始亦一言雖非究竟及真似合而亦得是觀行合二法論即字廣雅訓合荆谿云依訓乃成二物相合於理猶疎今以義求其跡不二方名爲即然其始覺與本覺合雖名爲合非二物合正是



荆谿體不二義良以始本覺體是一故知六即  
得名六合理即乃以逆修之覺與本覺合五皆  
順覺與本覺合六合無非體不二也荆谿有時  
亦以合名明不二躰故不二門云復由緣了與  
性一合方能稱性施設萬端緣了是始性豈非  
本修性躰一復名爲合四相似即今既釋佛乃  
似本覺良以此位始覺之功尚伏無明全未破  
故非真本覺唯得名爲相似即佛若四十一位

分破無明故得分分是真本覺名分真佛至極  
果位無明既盡本覺全彰故得名爲究竟成佛  
即究竟本覺亦究竟始覺亦是究竟始本一合  
亦是究竟始本俱忘例前五即皆有四義圓名  
字筆五以始對本論合及忘四義稍可唯初理  
即既全在迷豈有始覺及二義耶答理雖全迷  
而具三因及五佛性緣了二性豈非本有修因  
始覺果及果果二種佛性豈非理中究竟始覺



理若<sub>レ</sub>不具此等始覺名字等五便須別修證何  
得云全修在性但有即名無即義也自非由教  
圓位徒施今當相似位中四義文自分二初釋  
釋二初約三身明即佛前觀行位常用三即念  
佛三身觀覺雖成似覺未發加功不已今本覺  
三身相似而發與始覺三觀相似相應應是合  
義合而不忘非妙觀也問於一本覺約何要義  
顯示三身令人可見答本覺諸法即空假中覺

諸法假即相好身覺諸法空即法門身覺諸法  
中即實相身如此論之其義宛尔更於一覺約  
寂照說照而常寂自在神通即相好身寂而常  
照清淨智慧即法門身非寂非照而寂而照即  
實相身此之二三非皆縱橫不可思議乃是寂  
覺照覺雙遮照覺全不成始即是相應及俱忘  
義此位三身即佛義顯是故文中不特言覺示  
於即佛二相似下約四喻明相似行人本覺寂



照及雙相似而發成相似位三種之覺此覺似  
真若鑰若瓦比金比甄此之二物喻始似本如  
將至火先覺燄氣行欲近海預觀乎相此之二  
事喻於相似近乎分真前二約法論似後二約  
位論似二水性下勸證二初約事勸本覺清涼  
其猶冷水似覺飲之知消煩熱名字之人如熱  
渴者須三觀功掘無明地方得真似清涼之水  
徒聞此水不施觀功又無事行取水具物守渴

而終至極熱處二略舉下引文證相似相應功  
德之相如彼法華六根清淨文雖稍廣其相顯  
然行者易知故得名要六根同有五種似發所  
謂肉眼天眼惠眼法眼佛眼肉耳天耳慧耳法  
耳佛耳乃至意根亦有五相此之六五即三相  
應肉天法六即相好身相似相應慧六佛六  
即法門寶相相似相應以五眼等是不次第相  
似發故可以對於圓三身也行若能於三觀觀



佛六根三德不久相應五分證即即心觀佛託  
境顯性雖得相似尚屬緣修今則親證屬於真  
修分破無明起信論中稱隨分覺寂照雙融本  
覺真佛分分而顯從所顯說名爲分真從能顯  
言名爲分證四十一位皆受此名自分二初明  
初住一代教中圓位顯者唯起信論及華嚴經  
經說三身初住頓得論明八相初住能垂若此  
位不論破無明惑安得如此上冥下應故知十

向方伏無明初住但能斷於見惑此等經論其  
漸次教不可與其華嚴起信頓修頓證菩薩二  
槩是故今立詮中道教論次不次分於別圓今  
就彼經明分證佛此文分二初約發心明即佛  
二初約三法明發就初住名示即佛相位名發  
心發本覺心也常寂常照寂照雙融大本圓覺  
即一而三不發而發故成三發皆言一切名法  
果無外攝法不遺諸佛衆生色心依正同一覺



體全體爲緣爲了全非爲正緣因發故了正亦  
發了因發故緣正亦發正因發故緣了亦發盡  
三法圓融發則俱發緣發名功德能資成故了  
發名智慧能觀照故正發名境界是真性故是  
所顯故問三德既是一本覺性由證顯發今云  
一是所顯境界二名如能顯功德智慧若是能  
顯二則是修何得名證本覺三德若其理如是  
方不思議所以者何三雖性具緣了是修二雖

是修非適今有二若非修三法則橫二若非性  
三法則縱故釋籤明三點不縱橫云雖一點在  
上不同點水之縱三德亦亦雖法身本有不同  
別教爲惑所覆雖二點在下不同烈火之橫三  
德亦亦以二德修成不同別人理跡具足而不  
相収文輒出其意別教法身爲惑覆者良由不  
知本覺之性具染惡德是故染惡非二德也故  
別惑通惑業識事識煩惱結業三乘六道變易



分段此等一切迷中二法非二佛性既非佛性  
乃成定有能覆之惑是故但有法身本覺隨於  
染緣作上一切迷中之法以是名曰為惑所覆  
應知覆義不同泥土覆彼頑石既覆但中佛性  
之理如淳善人一切惡事非本所能為惡人逼  
令作壞惡故說善人為惡所覆應須還用隨染  
覺性別緣真諦及以俗中次第別修空假緣了  
或中邊緣了種種二因或初緣次了或初了次

緣次第翻破一切迷法顯於法身本覺之性  
是故覆理成於縱義圓人不亦以知本覺具染惡  
性中染惡修即二佛性故通別惑事業識等一  
切迷法當處即是緣了佛性豈有佛性更覆佛  
性如君子不器善惡俱能惑同惡人作諸惡事  
則彰已能何覆之有故即二迷以為緣了顯發  
於正緣了二德體迷而得義當所發元是修德  
復當能顯雖分修性皆本具故義不成縱言



別人理跡具足而不相収者亦爲不知本覺之性具染惡德不能全性起染惡修乃成理體橫具三法言不相収者以其三法定俱在性皆是所發猶如三人各稱帝王何能相攝是故不知性中三法二是修者二乃成橫圓人不然元知本覺具染惡性故使迷中一切染惡當處即是緣了佛性以此二修顯於一性如一主二臣主攝於臣臣歸於主三德相収亦復如是今初住

位所發三法皆性具故發則俱發故云不前不後以此三法二爲能顯一是所顯修性宛余故云亦不一時不一時故非橫不前後故非縱不縱不橫不思議發是故名爲初發心住二三智下約三身明佛前以正助二修對性明圓發相今約報智證法起應報應二修對法一性論分證佛從智證法從法起應即非一時三身頓得故非前後不縱不橫復見於此從始圓修一心



三觀今圓三智一心，中得即以此智證得法身。  
智性即色，三一融名妙色身。此身湛寂如鑑，  
無情形對像生。山毫靡間名應一切三身三德。  
體離縱橫今始發明，名開秘藏入理般若，名爲  
在此住無住住秘藏中。二以普下約被物明佛  
用。二初惣示三輪色像，即身輪一音，即口輪等。  
悅即意輪，身名神通輪，口名正教輪，意名記心  
輪。妙觀察智也。輪者轉義，亦能摧碾已心，證法。

轉入他心，能摧碾佗一切業惑。比三業應有十  
界，相皆是初住分得。佛用二應以下別示十界。  
上明能用種種三業不出十界。今分別之。先明  
佛三況出九界。佛應三土且說同居化有始終。  
須彰八相大機所見八相難思。若應小乘八種  
皆劣。大示出沒如水之波，全法界身八皆勝妙。  
小乘生滅體是無常如火燒薪終歸灰斷故。兩  
八相不分而分勝劣宛余此等皆是果人法則。



名佛威儀初住能爲名之曰具威儀屬身音聲  
屬口方便是意應以佛果而得度者卽爲現此  
三輪相也佛相至高尚能迹示以佛況九現之  
不難既現九果各具三業然非直現十果而已  
於一身復現十果重重無盡以得普現諸身  
三昧故也二初住下況後位初住始破一品無  
明分證三身垂形十果其相尚尙况二三住况  
第十住行向登地至于等覺破惑轉深德用轉

顯淨以心口而思說耶良由位位始覺本覺一  
合俱忘致使體用高廣若此六究竟卽一切諸  
法無不是佛迷故不知故圓實教不順迷情直  
一切皆是佛法此間相常衆生是佛不稟教  
者但有理是全不知是若聞此教於名知是若  
入五品於觀知是入十信者相似知是四十一  
位分真知是全登極果究竟證知一切諸法皆  
是佛法此自分二初據位直明等覺已名滿足



方便地菩薩究竟地始覺道窮本覺理極本始  
既泯無以名焉強稱妙覺大品般若四十二字  
字字互具諸字功德南嶽用對圓頓教中四十  
二位初住阿字中四十字對至等覺最後茶字  
當於妙覺雖一一位皆能徧具諸位功德然是  
分具今此極位乃究竟具諸位功德故引法華  
唯我釋迦與一切佛乃能究盡諸法之權實相  
之實達無明底到諸法邊名邊際智不思議權

智也今已究竟故名爲滿於種種法證本圓覺  
不思議實智也此豈極滿名爲頓圓復用第七  
無上士號顯智斷極有惑可斷名有上士等覺  
位也無惑可斷名無上士即是妙覺斷德究竟  
名大涅槃更有過者名有上士亦等覺也更無  
過者名無上士即是妙覺智德究竟名  
二約喻稱用彼大經月愛之喻十五日月對四  
十二圓因果位皆智光增惑暗減滅故初之三



日對住行向三十位也從初四日至十三日對  
十地位十四日以對等覺十五日對妙覺位此  
乃合前三十開後十地若三十三天同服甘露  
對四十二位皆證常理開前三十位對三十天  
合後十地用對一天等覺對二妙覺極位次對  
釋天若四十二字字字互具四十一字對於圓  
證四十二位位位相收則前後俱開示悟入佛  
之知見對圓真因四十位者前後俱合也今十

五日月光既滿即智德圓暗無不盡即斷德極  
故大師云此之增減日日有之此之智斷位位  
有之故不更用後十五日邪光截也復以衆星  
對諸日人月喻果佛最上等言皆是稱歎究竟  
一字一佛有下以例諸號明難說圓極之果所  
以望真因尚帶虛設委未盡故七種方便一  
切九夫悉是虛名一無實義故大經云世諦但



有名無實義第一義諦有名有實義佛是究竟  
第一義故又復應知非別有法名爲究竟第一  
義諦毗盧遮那徧一切處一切諸法皆是佛法  
是則世間及出世間二死五生至轉茲多蠢動  
蛸蜚五無間等若因若果無非圓極第一義諦  
故此諸名皆實不虛悉是究竟佛之異名是故  
稱爲佛有無量德應有無量名今唯舉佛一名  
當之故諸大乘明於佛號或增或減皆是四悉

赴物機今於通號十名之中舉第九佛也淨名  
經云正徧知如來及佛此三句義大千衆生皆如  
阿難多聞第一以却之壽不能盡受隨其宜樂  
舉此三名以少況多功德無盡二釋說字二初  
牒釋悅是暢悅懷是心懷若就此經即是如來  
久修久證念佛三昧蘊之在懷今機扣發說之  
乃暢昔之所懷二即十下示相據今之說正在  
念佛次文委示今不預陳故且通塗明其說相



文二初明所說法相十二部經。惣明說相謂或作長行說或作重頌說或作未曾有說或作無問自說說等若八萬法藏乃具示所說種種法門合云四千且舉大數然應了知有多八萬且約四諦示諸八萬若言八萬法藏即苦諦八萬塵勞即集諦八萬對治門八萬三昧門八萬陀羅尼皆道諦八萬波羅蜜即滅諦今雖示一義已兼三以法藏名是蘊聚義判屬苦諦復由蘊

義兼得三諦蓋四名言不離陰故如俱舍云牟尼說法蘊數有八十千彼體語或名是色行蘊攝故十二八萬俱通小行或云小乘唯有九部大則十二或云小有十二大唯九部或云大小皆有十二六度四等雖在大乘亦通三藏事度菩薩然其名數四教皆同須就所詮具中二理定其權實復論四種能趣觀行用簡偏圓使寶渚化城迂直不濫二又於下明能說善巧二初



於一法一門明四悉上之所列八萬等法既通  
四教即是生滅八萬無生八萬無量八萬無作  
八萬如生滅八萬趣舉一法須開四門四門假  
人同皆叵得若其實法四義不同約有門說念  
念無常如燈焰焰約空門說三假浮虛猶如雲  
霧變亦門說二相從容雙非門說二相俱捨四  
中一門機生熱故四悉被之爲未種者作世界  
說令其樂欲讚用受行爲已種者用中二悉善

根未發作爲人說今起宿善信戒進念惡未破  
者必對治說令其三毒豁余冰消爲已斷者第  
一義說令得契真草凡成聖佛智鑑機說之必  
中知不入理今得三益知不破惡今得二益無  
善可發作世界說但生歡喜若全無益佛則不  
說二若一下例諸法諸門示四悉上明一門被  
機四悉餘之三門被機亦余八萬中一四門四  
悉被機既余其餘諸法四門四悉被機亦然一



教八萬門悉既然三教亦亦八萬法藏例於塵  
勞及對治門三昧慧持波羅蜜等一一八萬法  
法四教教教四門門門四悉其十二部六度四  
等準此可知以此略明佛說之相三釋觀字即  
所筌也上十二部八萬法等豈非所說然是泛  
舉顯於能說下無量壽及今觀字的是此經所  
說義也釋觀分二初牒釋雙標牒起觀平字以  
觀去聲釋之乃用觀法觀於勝境若非觀法將何

觀之撒經所詮立茲題目經明十六以為能觀  
今釋題名唯論三觀經文是別題是題名題題  
於別別別於題若也立題收文不盡則不能應  
篇章之式故知今立三觀釋觀乃是經文十六  
觀體若就十六各各示於三觀相者其文繁廣  
故於釋題題而示之令其修者以茲觀法入十  
六門則梵境皆三心心絕妙四依被物言簡意  
周雙標次第及以一心三觀者此乃以次顯於



不次不融別觀無以明圓如止觀中皆用思議顯不思議二從假下據教雙釋二初次第三觀二初列名指經所列諸名釋中自見二今釋下釋相結果依前列名釋三觀相第一空觀而有二名假是等者見思取境無而謂有虛假凡俗知虛名諦二空之理是審實法知實名諦不究俗虛莫知真實要須照假方得入空是故名曰從假入空又假是等者迷世俗時謂虛是實則

二俱不諦若悟俗虛必知真實則二俱諦故復得名二諦觀也此觀等者修觀名因證智名果釋論三智為易解故分屬三人故以聲聞對一切智即空觀果當於別教十住位也第二假觀亦有二名先行住空墮二乘地若修假觀能成伴法能益衆生觀空欲作入中方便故於空智證而不住三界惑著須蕩令空諸法因緣須究本末見思重數如塵若沙以大悲心徧觀徧覺



名爲知病諸法諸門破性破相一一對治無不  
諳練是名識藥隨惑淺深知機生解神通騷動  
智辨宣揚四悉當宜各令獲益如此授藥方肯  
服行皆由證空能入此假故此觀名從空入假  
而言等者前除見愛破假用空今遣塵沙破空  
用假於空於假各一破用前後相望至今均等  
故復名爲平等觀也此觀等者若依釋論以菩  
薩人對道種智即假觀果位在十行二空下第

三中觀初雙標初觀空生死者別人初心信今知  
覺本是常住中道佛性從教道故名爲假中唯  
善唯淨不具染惡雖無染惡其性靈知強覺忽  
生境界斯現分別境相執著我人不昧之知邪  
思邪見現前染惡既非性具皆是隨緣變造而  
有是變造故非性本然是故見思不即中道定  
須破故即義不成故不得云唯愛唯見唯色唯  
香設欲修中能所不絕故修空爲正中觀爲傍



何者心既著有須別緣空破茲愛見所觀之空  
是二乘法既非性具乃是別修空非畢竟是故  
空觀但空生死次觀空涅槃者生死之有雖已  
破除心又著空須別緣假破此空著假是建立  
是菩薩法非性具故亦是別修能蕩空著名空  
涅槃此之等者前空生死見思惑忘次空涅槃  
塵沙惑盡二惑既盡心無徧著是故得爲雙遮  
方便初觀等者復因次第用於二觀觀其二諦

是故得爲雙照方便方便立已圓觀可修於十  
向中即以所顯中道佛性而爲能觀中道之觀  
諦觀不二惑智一如三觀圓融是無作行故得  
自然入薩婆若此觀之果名一切種智位在初  
地二一心三觀斯乃稱性而觀絕待而照蓋一  
切法性是法身般若解脫如伊字三點三非孤  
立一一圓具舉一即三乃以三德而爲三諦般  
若是真解脫是俗法身是中德既不縱不橫諦



乃絕思絕議此是佛之所諦今以此諦而爲所  
觀諦既即一而三觀豈前後而照故依妙諦以  
立觀門即於一心而修三觀此觀觀法能所雙  
絕況無量壽佛本修此觀成就三身法報泯然  
真應融即非茲妙觀寧顯妙身化主若斯徒衆  
亦余正報既妙依報豈鹿故十六境皆須妙觀  
此文爲三初依智論釋二初釋相二初約法釋  
三智即前次第所明一切智道種智一切種智

令易解故分屬三人冠性圓論三智實在一心  
中得三智是果三觀是因果在一心因豈前後  
因果不二方曰同修故舉智後即明三觀只一  
觀而三觀者趣舉一觀即具三觀舉一空觀假  
中亦空三觀悉能蕩相著故舉一假觀中空亦  
假三觀皆有立法義故舉一中觀空假亦中三  
觀當處皆絕待故若知三觀只在一心則一一  
觀任運具三也觀於一諦而三諦者諦觀名別



其體不殊全諦發觀觀還照諦既無別體以何  
義故立諦立觀若欲分別就三因說性三爲諦  
修三爲觀性了是真性緣是俗正是中諦不是  
了因非大真諦俗中亦然此之三諦方與三觀  
殊性不殊頑空爲真與觀體別俗中亦余三觀  
互具者蓋性三本融全性成修此之謂矣二類  
如下引類釋以有爲法類無爲性一刹那心初  
生即滅兩間名住不無三相而在一心三相無

常同居促念三觀稱性無作無生具於一心其  
義何爽二此觀下結果不明智果觀法無歸故  
示觀成或滅理顯豁然妙證三種智慧實在  
心或具論三智或從勝說只但名爲一切種智  
寂滅等者論自解釋一切種智雙寂二邊無明  
之相雙照二諦種種行類始自初心圓修三觀  
妙觀中道念念雙忘而即二邊念念雙照一心  
三觀法尔如然今入分真本智顯發全由始行



照之功二引中論證論云因緣所生法我說即是空亦名爲假名亦名中道義論通行三全證圓觀觀所對法豈有不從因緣生者今修圓觀必先解知能生因緣及所生法皆不思議方於此境觀空假中又須了知妙諦妙觀悉是能觀因緣所生陰等諸境皆是所觀前且直云觀於一諦而三諦須知於陰等境觀一諦等也勿守略文須尋觀義又不可謂先解所觀不思議故

便不得言陰及無明何者本說因緣及所生法是不思議若非無明何名因緣若非陰等何名所生有人見釋心法妙云心法在因約迷以說佛法在果約悟以說轉便難云心法稱妙何得是迷良由此人不知所以解迷是妙方曰圓人如論苦集稱爲無作及十二因緣名不思議豈不得云不思議無明人雖解妙法體是迷不知理即一向在迷妙覺一向屬解中間四位迷解



共俱名字即人若不觀迷何處用觀等覺之位  
若不破迷寧登妙覺以上上智斷下下惑非迷  
耶人之多僻其類實繁釋論三智已如前釋三  
此觀下約妙結示初一句惣歎微妙次二句約  
二三歎妙一不定一一即是三三不定三三即  
是一釋論以不決定解不可思議次三句對上  
六歎妙上明一三融即惣一妙覺也即此一觀  
偏入諸門名一觀一切觀雖入諸門只一妙觀

名一切觀一觀觀若定一莫入多門觀若定多  
不可爲一實不可以一多思議故云非一非一  
切後二句結示雖非一多能攝一切是故十六  
無非妙觀四釋無量壽正示三觀所觀境也前  
明三觀且以三德及以三因而爲諦境蓋示所  
觀融即用顯能觀絕妙須知性中三德體是諸  
佛三身即此三德三身爲我一心三觀若不然  
者則觀外有佛境不即心何名圓宗絕待之觀



亦可弥陀三身以爲法身我之三觀以爲般若  
觀成見佛即是解脫舉一具三如新伊字觀佛  
既尔觀諸依正理非異塗此意不明非今觀佛  
釋此爲三初牒名從梵無量壽者已華言天  
竺梵語稱阿弥陀二佛本下從真出俗二初約  
本無三標無量壽乃以無量而爲其量是則題  
中已言壽量壽量依身乃成三義故約三義而  
論有無所言佛者究竟覺也理智既極始本兩

忘無相無名不可說示寧得立其身及壽量三  
隨順下隨世俱立二初列三身各三據究竟覺  
此一義諦則不可言身及壽量爲度生故乃順  
世間立名立相故說三身及三壽量是則真佛  
無三隨世故有然須了知有無之意言佛本無  
身無壽量者但無有相隨情之三非無性具微妙  
身等是故真佛究竟一切淨穢法門若一向無  
何異小乘所詮真理故真無俗有真有俗無皆



是悉檀不可徧執。今文意者蓋立三身釋無量壽恐執定有是故先言佛本無三隨世說有得此意已分別三身三壽三量則無滯也。二法身下釋三身三義二初約義分別二據理融即以有次文盡理融即故今且約修二性一一塗分別初自爲三初法身二初別釋三初法身者師軌釋法捨通從別通則生佛俱軌法性然其九界雖軌而違如人依師不順師教唯有諸佛從

初發心軌法而修今能究竟耳合法性故大經云諸佛所師所謂法也以法常故諸佛亦常順法性故名法爲師實非所師與能體別故即前師法而爲其身雖名爲身已出五陰故非色質及非心智色是初陰心智即四陰既其非陰亦非入界故非三科任持攝屬此則已簡分段變易以二生死陰等攝故亦可色質簡應心心智簡報三科簡因既非此等何以狀名爲物機故頌



指法性名爲法身二法性下壽連持之壽親依  
命根今法性壽非識息煖報得命根亦非三事  
連持之壽爲物顯德乃指法性非八相遷非九  
世易強名爲壽三此壽下量壽之分量合論長  
短及以延促今法性壽實無此等分量之相此  
則通簡若別簡者長是報佛短是衆生能延能  
促即是應身非此等量爲成觀故強指法壽同  
虛空量二此即下惣示法性三義非陰聚身非

報得壽非長短量不可思議強於法性說身說  
壽說量故二報身二初稱法有報二初引經報  
即酬報也修行是因感於妙報而酬因也法華  
證智德經云慧光照無量久修業所得大般涅  
槃證斷德也此二果德酬答修因是故名報二  
如如下釋相感報之時其相何似故以一法二  
喻顯之如名不異所觀差別不名如境智外有  
境不名如智各二如者境如如智智如如境此



之境智故得應真智慧名通故以果覺菩提簡  
之即是無上菩提之智與法性境相應相冥此  
舉函蓋喻其相應恐謂函蓋雖際畔相當終存  
兩相故重舉水乳以相冥令知始本同是覺性  
其體泯然正同水乳則顯境外無智智外無境  
水乳可見二法身下於報立三即身壽量也  
中一一言法身者報智所冥離法無報故初身  
言非身者非應佛有分齊身非不身者非報佛

無分齊身又非身則非有非不身則非空中之  
法身乃本覺體始覺冥此能冥亦忘爲成觀故  
強名報智二法壽下明壽言非壽者非應同通  
持之壽非不壽者非報智不連持壽雙非二邊  
冥中法體強名之意同前身也三法量下明量  
非應有量非報無量及非二邊義同身壽三應  
身三初明應物有三初身如谷谷響大小隨聲  
如鑑現形端醜在質應萬物感現勝劣身二應



同下壽身既同物壽豈差機三應同下量隨宜  
長短示量無量二智與下明依二有應三初法  
智即報身躰即法身此二冥合應用無方二如  
水下喻真金上色須水銀和方能塗去物顯此  
一緣金無塗用三功德下合報智功德契會法  
身隨有機慶應無不徃三能爲下明應徧三上  
二初雙明報應二有量下單示應身初義者上  
所說報但論冥法即自受用也今明垂應以受

用常任之應對於生身無常之應示二迹用是  
故雙明身等身即生身有分齊相故名爲身非  
身是報無分齊相故曰非身小般若云佛說非  
身是名大身大身者乃他受用身也無分齊身  
其壽則常故無量也有分齊身壽則無常故有  
量也此二應用乃依真中二理而住機依事業  
二識而見住理廣如金光疏說二識委在起信  
論明論意要在事識見則取色分齊故名應佛



業識見則離分齊相故是報身此義至後釋觀  
佛觀鈔中辨之行者須知常身無量通應三土  
無常有量但應同居所以者何蓋實報機分證  
論見他受用身方便土人唯稟別圓所見佛相  
雖小優降然匪生身悉是報佛若同居土具四  
教機稟別圓者能觀報佛故法華明常在靈山  
華嚴說法盡未來際及諸大乘即於應相見是  
法性尊特之身故知常身徧應三土若無常身

唯應同居逗藏通機生凡夫善也次義分二初  
明有量一義上之所說自受用外畫三土身皆  
名為應其他受用雖就對機名之為應而是實  
因之所感剋復名為報非是差別逗會之用若論  
逐物隨緣參差長短身量者須就同居無常用  
說故今別示應身之相但於有量開出兩量而  
此兩量依於事識但空見故唯屬無常若依業  
識不空見者即此無常全體是常則常無常二



用相即二鳥雙游也。若上二土機息應轉亦是無常以非八相故。且言常言七百等者。首楞嚴三昧經云。堅首菩薩問。佛壽幾何。佛令往東方過三萬二千佛土。於莊嚴國問照明莊嚴自在王佛。彼佛答云。如釋迦壽。我亦如是。汝欲知者。我壽七百阿僧祇劫。堅首迴此白佛。阿難云。彼佛乃是釋迦異名。雖機勝見長而七百猶可數。故亦是有量之量。若阿彌陀人天莫數。故是有

量之無量也。二應佛下結。應佛皆然。佛佛既皆三身圓證。應身被物。物壽長短。豈不隨順。各示兩量。故彌陀現長。亦能現短。釋迦現短。亦能現長。故大論第三十六云。當知釋迦文佛更有清淨國土。如阿彌陀佛國。阿彌陀佛亦有不嚴淨國。如釋迦文佛國。又第三十八云。此間閻浮提故釋迦壽。應短。餘處好故。佛壽應長。故涅槃十二云。西方去此三十二恒沙。有無勝國。所有



莊嚴如安樂世界我於彼土出現於世斯皆隨  
逐物機也二然下據理融即上辨三身法是本  
有報約修成應論現往其言似縱須知報應二  
種之修性德本具雖是性德修相宛然全性起  
修全修在性三二冥泯思說莫窮不可等者如  
上豎論顯非並一若言性具三身壽量顯非別  
異若作並別一異之解即乖所詮圓常法躰即  
一而三故不橫即三而一故不縱非縱非橫不

可思議如此解者乃會能詮玄妙之文也

觀無量壽佛經疏妙宗鈔卷上



所  
法城



卷之五

一、  
張



